

欽定續通志



欽定續通志卷三百三十三

列傳

宋三十七

張昱之

魏瓘

滕宗諒

劉越

李防

趙湘

唐肅

張述

黃震

胡順之

陳巖

安石

范祥

青

田京

周渭

梁鼎

范正辭

諷

劉師道

王濟

方偕

曹穎叔

劉元瑜

楊告

趙及

劉浞

王彬

張昱之字景山父祕自有傳昱之進士及第補樂清尉潤州觀察推官校勘館閣書籍遷集賢校理通判常州知溫州蔡齊薦其才可用擢提點淮南路刑獄楊崇勳知亳州恃恩爲不法誣蒙城知縣王申罪械送獄昱之廉得寃狀乃出申配姦吏若干人徙廣南東路轉運使吏人有犯其酋長得自治而多慘酷請一以國法從事權度支判官爲京西轉運使加直史館徙河北被邊諸州發卒斬西山木卒逃入契丹者歲數百人敵旣利其所開地又得亡卒故不爭昱之戒斬伐毋得深入北地卒亦不敢逃還爲鹽鐵副使擢天章閣待制河北都轉運按察使保州廣信安肅軍自五代以來別領兵萬人號緣邊都巡檢司以知州軍爲使置副二人分所領卒爲三部使援隣道太祖嘗用之有功詔每出巡別給糧錢以優之其後州將不復出內侍爲副數出巡部卒偏得廩賜軍中以爲不均通判保州石待舉言于昱之請合三部兵更出入季一出卽別給錢糧餘悉罷仍請以武臣代內侍時楊懷敏方任邊事尤不悅巡檢司雲翼卒惡石待舉遂殺之以作亂昱之自魏馳至城下召諸將部分攻城使人請懷敏曰不卽來當以軍法從事旣至以兵自衛昱之叱去衛者城開田況潛殺降兵數百人昱之預知其謀除戶部

副使既而坐前事奪職知虢州王則反貝州有言晁之在河北捕得妖人李教不殺使得逸去今乃爲則主謀事平無其人會冀州人段得政詣闕自言嘗爲叔父屯田郎中曇賊免緣坐且言曇以書屬晁之乃下御史按劾雖不得書猶奪三官監鄂州稅知漢陽軍稍遷刑部郎中復待制知湖州徙揚州以光祿卿致仕卒晁之喜吏事所至有聲

魏瓘字用之父羽奏補祕書省校書郎監廣積倉知開封府倉曹參軍持法精審明吏事上元闕前張燈與宦者護作宦者視瓘年少輒誅索侵擾瓘密以聞詔杖宦者遣之瓘門人魏綱上疏詆天書流海島瓘亦坐是停官復監鄧州稅鄂州茶以大理寺丞知衡山縣通判壽州歷知循隨安州提點廣南西路刑獄邕州獠戶緣逋貢沒婦女爲傭者一千餘人悉奏還其家就除轉運使劉鋹時計口以稅雖舟居皆不免至是而雷化欽廉高州猶未除瓘爲除之減柳州無名役四百人召權度支判官尋以罪降知洪州徙梓州路轉運使還知蔡州潭州爲京西轉運使江淮制置發運使自主客郎中遷太常少卿知廣州築州城環五里疏東江門鑿東西澳爲水閘以時啟閉焉拜右諫議大夫再任臨江軍判官史沆性險詖嘗爲瓘所劾免會廣州封送貢餘椰子煎等餉京師輒邀留之飛奏指以爲珍貨詔遣內侍發驗無有沆坐不實廢瓘亦降知鄂州未踰年復爲陝西轉運使徙河北以給事中知開封府政事嚴明吏民憚之內東門索命婦車得賂遺掖庭物付府驗治獄未上內降釋罪諫官吳奎言法當執奏而瓘不卽奏行請以廢法論降知越州儂智高寇廣東西獨廣州城堅守不能下於是論築城功遷工部侍郎集賢院學士復知廣州兼廣東經略安撫使給禁卒五千聽以便宜從事屬狄青已破賊召還糾察在京刑獄議者請開六塔河塞商胡北流宰相主其說命瓘按視還奏以爲不可塞下溪州蠻彭士義叛將發兵討除進龍

圖閣直學士知荆南璫以爲五溪之險師行鳥道諸將貪功生事于國家何所利因條上三策以招徠爲上守禦爲下攻取爲失不報後卒如璫議徙澶州滑州又徙鄧州請老以吏部侍郎致仕卒璫所至整辦與人置對未嘗屈弟瑗

瑗字子浩以父恩授秘書省正字爲吏強敏名齊于璫嘗通判陳州適歲饑百姓相率強取人粟坐死者甚衆瑗曰此迫於窮餓豈得已者坐其首黥之歷知壽潤滁安州壽州盜殺寺童子有司執僧管服瑗憫其非罪命械縱去一府爭以爲不可後數日得真盜富人犯法當死而死獄中瑗曰是嘗欺匿異籍孤弱者財所以自斃觀不可窮治爾豈更受賕而爲之謀乎後有告者如瑗所料累官農卿知福州徙廣州以疾告得知江寧府晚昏眊縱私人亂法日笞扑無罪吏卒監司劾奏召判刑部仍致仕進衛尉卿卒

滕宗諒字子京河南人與范仲淹同年舉進士其後仲淹稱其才乃以泰州軍事推官召試學士院改大理寺丞知當塗邵武二縣遷殿中丞代還會禁中火詔劾火所從起宗諒與祕書丞劉越皆上疏諫宗諒曰伏見掖庭遺燼延熾宮闈雖沿人事實繫天時詔獄未釋鞫訊尙嚴恐違上天垂戒之意累兩宮好生之德且婦人柔弱萬一懷冤足累和氣疏奏仁宗爲罷詔獄時章獻太后猶臨朝宗諒言國家以火德王天下火失其性由政失其本因請太后還政而越亦上疏太后崩擢嘗言還政者越已卒贈右司諫而除宗諒左正言後遷左司諫坐言宮禁事不實降尙書祠部員外郎知信州與范諷雅相善及諷貶宗諒降監池州酒久之通判江寧府徙知湖州元昊反除刑部員外郎直集賢院知涇州葛懷敏軍敗于定州諸部震恐宗諒顧城中兵少乃集農民數千戎服乘城又募勇敢諜知寇遠近及其形勢檄報旁郡使爲備會范仲淹自環慶引蕃漢兵來援時天陰晦十餘日人情憂沮

宗諒乃大設牛酒迎犒士卒又籍定州戰沒者於佛寺祭酹之厚撫其孥於是邊民稍安仲淹薦以自代擢天章閣待制徙慶州上言朝廷既授范仲淹韓琦四路馬步軍都總管經略安撫招討使而諸路亦帶招討稱號非所宜詔罷之御史梁堅劾奏宗諒前在涇州費公錢十六萬貫及遣中使檢視乃始至部日以故事犒賚諸部屬羌又間以饋遺遊士故人宗諒恐連逮者眾因焚其籍以滅姓名仲淹時參知政事力救之止降一官知虢州御史中丞王拱辰論奏不已復徙岳州稍遷蘇州卒宗諒尚氣倜儻自任好施與及卒無餘財所蒞州喜建學而湖州最盛學者傾江淮間有諫疏二十餘篇

劉越字子長大名人士少孤貧有學行亦宗諒同年進士嘗知襄城固始二縣有能名既贈官又官其一子賜其家錢十萬

李防字智周大名內黃人舉進士爲莫州軍事推官隨曹彬入契丹授忠武軍節度推官括磁相二州逃戶田增租賦十餘萬因請均定田稅又請縣有破逃五十戶者令佐降下考百戶殿三選二百戶停所居官能招攜者旌賞之改祕書省著作佐郎通判潞州遷祕書丞體量二浙民饑建言逃戶田宜卽召人耕種使人不敢輕去剛畝而官賦常在又請京師置折中倉聽人入粟以江浙荆湖物價之擢開封府推官請與判官間三五日卽府司軍巡院察冤獄出爲川陝路轉運副使先是沿江水遞歲役民丁甚衆頗廢農作防悉以城卒代之會分川陝爲四路徙防梓州路轉運使累遷尙書工部員外郎爲三司戶部判官景德初江南旱詔與張知白分東西路安撫上言秦義嘗增江淮兩浙荆湖權酤錢民頗煩擾江南以歲飢權罷而淮南荆湖未被德音詔悉罷之仍詔義等毋得復增權酤之利遂爲江南轉運使淮南舊不禁鹽制置司請禁鹽而官自鬻之使兵夫輦載江上且多漂失之患防請令商人入錢帛京師或輸芻糧西北邊而給以鹽則公私皆利後采用之徙知應天府鑿府西障口爲斗門洩汴水淤旁田數百畝民甚利之又徙興元府入爲三司鹽鐵判官失舉免官後起通判河南府徙知宿延毫

三州爲利州路轉運使累遷兵部郎中糾察刑獄擢右諫議大夫知永興軍進給事中復知延州更耀潞二州卒
防好建明利害所至必有論奏朝廷頗施行之其精力過人防在江南晏殊以童子謁見防命賦詩使還薦之後
至宰相

趙湘字巨源華州人進士甲科歷彰武永興昭武三軍節度推官遷祕書省著作佐郎知新繁縣以吏最命知商
州徙隴州興元府再遷太常博士上補政忠言十篇召判宗正寺上書言元德李太后母育聖躬請祔太宗廟室
後用其說擢殿中侍御史權判三司句院上言今季冬誕聖之月願詔有司自仲冬留大辟弗決俟孟春臨軒閱
視眞宗曰慮繫囚益淹久吏或因緣爲姦爾湘又上書請封禪未幾命管勾南宮北宅事東封泰山爲東京留守
推官禮成遷侍御史昇州火命湘往致祠兼問民疾苦還言轉運使劉炤弛職不按部知洪州馬景病不任事皆
罷黜之糾察刑獄改尙書刑部員外郎兼侍御史知雜事湘又言舊制文武常參官日趨朝並赴待漏院俟禁門
闢今多後時乃入望敕正衙門主者察晚至以懲其慢時帝親製五箴以自儆湘因言宗室風化所本宜有以訓
厲願特製銘以賜南北邸帝悅爲製宗室座右銘賜監王元偓以下并及湘祀汾陰爲考制度副使請如周官置
土訓錄所過州縣山川與俗好惡日上奏御兼判宗正寺歷三司戶部度支副使祀太清宮管勾留司三司事爲
鹽鐵副使再遷工部郎中直昭文館出知河南府徙河中府爲京西轉運使又徙鳳翔府延州遷太常少卿知襄
州又知應天府進右諫議大夫復知河南爲集賢院學士以疾徙虢州卒

唐肅字叔元杭州錢塘人當錢俶時始七歲能誦五經名聞其國中舉進士調郿縣主簿徙泰州司理參軍有商
人寓逆旅而同宿者殺人亡去商人夜聞人聲往視之血沾商人衣爲捕吏所執州趣獄具肅探知其寃持之後

數日得殺人者後守雷有終就辟爲觀察推官遷祕書省著作佐郎歷知聞喜福昌縣通判陝州召拜監察御史遂提點梓州路刑獄遷殿中侍御史入爲三司戶部判官出知舒州遷侍御史爲福建路轉運使判三司開折司再遷工部郎中知洪州尋爲江南東路轉運使擢三司度支副使奉使契丹還遷刑部爲龍圖閣待制登聞檢院知審刑院卒子詢以父任爲將作監主簿累遷右諫議大夫進給事中卒贈禮部侍郎詢子垌附王安石爲監察御史裏行自有傳

按宋史此下有唐肅子詢傳無事蹟足錄今從刪

張述字紹明遂州小溪人舉進士調咸陽縣主簿改大理寺丞遷太常博士皇祐中仁宗未有嗣述上書言宜慎擇宗親才而賢者異其禮秩試以職務俾內外知聖心有所屬則天下大幸至和元年復上疏曰臣歷觀前世或令出宮闈或謀起閹寺或姦臣首議利幼主以專政假後宮以盜權安危之機發於頃刻朝議恬然曾不爲計此臣拳拳爲陛下言也述前後七上疏最後語尤激仁宗終不以爲罪述慷慨喜論事歷通判延州知泗州皆有政蹟後以尙書職方員外郎爲江浙荆湖福建廣南路提點坑冶鐵錢事行至萬州道病卒

黃震字伯起建州浦城人進士及第累遷著作佐郎通判遂州嘗給兩川軍士緡錢詔至西川而東川獨不及軍士謀爲變震白主者曰朝廷豈忘東川邪殆詔書稽留爾卽開州帑給錢如西川衆乃定明日詔至累遷尙書都官員外郎提點湖北路刑獄遷判三司磨勘司擢江淮發運使先是李溥自三司小吏爲發運使十餘年姦賊狼籍震將行上書自陳辭頗憤激既至發溥姦贓數十事溥坐廢而震亦爲溥訟奪一官罷畏謂權不敢自直及謂貶乃復官知饒州徙廣東轉運使廣南歲進異花數千本至都下枯死者十八九道路苦其煩擾震奏罷之既卒詔進其官一等

胡順之字孝先原州臨涇人登進士第試祕書省校書郎知休寧縣民有汪姓者豪橫縣不能制歲租賦常不入

適以訟逮捕不肯出順之曰令不行何以爲政命積薪環而焚之豪大駭少長趨出叩頭伏辜推其長械送州致

之法按凍水記開載胡順之爲浮梁縣令民賦有金者素豪橫不肯出租養犬數頭里正近其門輒噬之繞垣密植橘柚人不可入每歲里正常代之輸租順之至官乃令里正聚葉自抵其居以葉塞門而焚之賊氏人皆

逃逸順之悉令掩捕驅至縣男子年十六以上盡痛杖之自是賊氏租常爲一縣先此事與宋史本傳所載休寧縣民汪姓事相類史不言其嘗知浮梁爲青州從事高麗入貢中貴人挾以

爲重使州官旅拜於郊順之曰青大鎮也在唐押新羅渤海奈何卑屈如此獨不拜大姓麻士瑤陰結貴侍匿兵

械服用擬尙方親黨僕使甚多州縣被陵蔑莫敢發其姦會士瑤殺兄子溫裕其母訴於州衆相視曰孰敢往捕

者順之持檄徑去盡得其黨有詔鞫問士瑤論死其子弟坐流放者百餘人改著作佐郎知常熟縣按凍水記開作洪州食判

後家於洪州遷祕書丞分司南京仁宗卽位遷太常博士天聖明道間再上宰相書乞太后還政宰相匿不以聞太后

崩其書出宰相家仁宗嘉其忠特遷尙書屯田員外郎按凍水記開以覃恩遷屯田員外其後數論朝廷事仲淹愛其才然挾術

尙權喜縱橫捭闔以目失明廢州里皆憚焉

陳貫字仲通其先相州安陽人後葬其父河陽因家焉少儻數上疏言邊事舉進士真宗識貫名擢實高第爲

臨安縣主簿以祕書省著作佐郎爲刑部詳覆官改祕書丞爲審刑院詳議官歷知衛州涇州督察盜賊禁戢不

肖子弟簿書筦庫賦租出入皆自檢覈嘗謂僚屬曰視縣官物如己物容有姦乎擢利州路轉運使歲饑出職田

粟賑饑者又帥富民令計口占粟悉發其餘徙陝西累遷尙書度支員外郎入爲三司鹽鐵判官領河北轉運使

請疏徐鮑曹易四水興屯田徙河東歷三司戶部鹽鐵副使以刑部郎中直昭文館知相州還朝卒貫喜言兵咸

平中大將楊瓊王榮喪師而歸貫上書曰前日不斬傅潛張昭允使瓊輩畏死不畏法請自今合戰而奔者主校

皆斬大將戰死裨校無傷而還與奔軍同軍蚡城圍別部力足救而不至者以逗留論真宗嘉納之又嘗上形勢
選將練兵論三篇大略言地有六害今北邊旣失古北之險然自威虜城東距海三百里沮澤礪确非敵所能輕
入由威虜西極狼山不百里地廣平利馳突此必爭之地凡爭地之利先居則佚後起則勞宜有以待之昔李漢
超守瀛州契丹不敢視關南尺寸地今將帥大抵用恩澤進雖謹重可信卒與敵遇方略何從而出國家收天下
材勇以備禁旅恬于休息久不識戰可以衛京師不可以戍邊境請募土人隸本軍籍丁民爲府兵使北捍契丹
西捍夏人敵之情僞地勢之險易彼皆素知可不戰而屈人之兵矣後以疾卒著兵略世頗稱之子安石

安石字子堅以蔭鎖廳及第嘉祐中爲夔峽轉運判官民苦蠱毒殺人捕誅其魁并得良藥圖由是遇毒者得不
死提點陝西刑獄攝帥鄜延能用謀者敵動靜輒先聞嘗救邊民戒嚴旣而數萬騎奄至無所獲而去璽書嘉之
歷使京西河東淮南京東知蘇州邠州河中府加集賢殿修撰爲河東都轉運使議行鹽法謂其僚曰興事當有
漸急則擾乃出鹽付民而俾之券使隨所得貿易鬻畢而歸券私販爲減進天章閣待制官軍西征時遣縣令佐
督餉安石謂文吏畏怯武人邀功乃但取敢行者申約束以防衆潰王中正帥東師而西報安石持四十日糧而
師駐白草平獮月安石深念曰吾頓兵益久而秦甲未至倘不足於食將以乏軍興罪我卽擅發民再餉乃以聞
李舜舉劾其專詔置獄於潞安石自麟州會逮俄而他路餽糧多不繼神宗察其無罪赦之尙書省初建召爲戶
部侍郎嘗與右曹李定同奏事帝目留之曰卿豈非在淮南日不肯保李定持服者乎對曰詔問臣臣不敢不以
實奏帝曰以實事君朕所與也進吏部侍郎選人將改京官須次久臨當引對率困於刑寺審問或沮以微文則
一跌不復安石請罷再問以絕曩弊遂爲後法出知永興軍鄧襄陳鄭州河陽至龍圖閣直學士紹聖元年卒年

范祥字晉公邠州三水人進士及第自乾州推官稍遷殿中丞通判鎮戎軍元昊圍城急祥帥將士拒退之請築劉瑋堡定川砦從之歷知慶汝華三州提舉陝西銀銅坑冶鑄錢祥曉達財利建議變鹽法後人不敢易稍加損益人輒不便提點本路刑獄制置解鹽累遷度支員外郎權轉運副使古渭州距秦州三百里道經啞兒峽邊帥數請城之朝廷以餽餉之艱不許祥權領州事驟請修築未報輒自興役蕃部驚擾青唐族羌攻破廣吳嶺堡圍啞兒峽砦官軍戰死者千餘人坐削一官知唐州後復官提舉陝西緣邊青白鹽改制置解鹽使卒嘉祐中包拯言祥通陝西鹽法行之十年歲減權貨務使緡錢數百萬其勞可錄官其子孫景郊社齋郎熙寧中平洮岷疊宕河州數千里置郡縣以古渭爲通遠軍權陝西轉運副使張詵奏朝廷復洮隴故地自將帥至裨佐悉有功賞皇祐中轉運使祥卽古渭爲砦此舉足以消沮邊隙身黜謀廢臣竊悲之冀推原舊功少賜褒卹詔贈祕書錄一子未官者子育

育字異之舉進士爲涇陽令以養親謁歸有薦之者召見授崇文校書監察御史裏行西夏入環慶詔育行邊還言寶元康定間王師與夏人三大戰而三北今再舉亦然豈中國之大不足以支夏人數郡乎由不察彼己妄舉而驟用之爾昨荔原之役夏人聲言我自修壘不與漢爭三犯之然後掩殺雖追奔亦不至境由是觀之其情大可見矣又使河東與韓絳築囉鄂特二砦始調外郡稍遠邊城前後三十萬夫遼州最爲窮僻然猶土戶配夫四百三十四僦直計三千緡下者十六人其直十萬輦運所經二十二驛宣撫司不先告期轉運使臨時督辦致民皆破產上下莫敢言獨遼守李宏能約民力所勝而餽不失期願以訴其實翻令鞫罪願貸被劾官吏其芻糧在

道者隨所至受之使已困之民咸蒙德澤神宗皆從之坐劾李定親喪匿服罷御史知韓城縣詔往鄜延議畫地界育言保疆不如持約持約不如敦信前日疆場嘗嚴矣一旦約敗鬪者跌於前耕者侵於後是封溝不足恃也使入左去而兵革右興金繪朝委而烽烟夕舉是持約不足恃也今我見利而加兵當講好之後復自立界不亦愧乎安南行營郭達趙高以兵十萬伐交趾行及長沙病死相屬達高又不輯睦育疏其不便不從久之知河中府以直龍圖閣鎮秦州元祐初召爲太常少卿改光祿卿樞密都承旨出知熙州時又議棄質孤勝如兩堡育爭之曰熙河以蘭州爲要塞此兩堡者蘭州之蔽也棄之則蘭州危蘭州危則熙河有腰膺之憂矣又請城李諾平汝遮川曰此趙充國屯田古榆塞之地也不報入爲給事中戶部侍郎卒高宗紹興中採其抗論棄地及進築之策贈寶文閣學士

田京字簡之世居滄州其後徙亳州鹿邑舉進士調蜀州司法參軍自秦州觀察推官改祕書省著作佐郎爲大理寺詳斷官趙元昊反侍讀學士李仲容薦京知兵法召試中書擢通判鎮戎軍入對陳方略尋爲經略安撫判官會遣翰林學士晁宗慤卽軍中問攻守孰便衆欲大舉入討京曰夏人之不道久矣未易破也今欲驅不習之師深入敵境與之角勝負此兵家所忌師出必敗或曰不如講和京曰敵兵未嘗挫安肯降我哉未幾元昊使黃延德叩延州乞降以奇兵出原渭敗大將任福夏竦素不悅京坐是改通判廬州徙知邵武軍提點河北路刑獄事乃上言請擇要官守滄衛鑿西山石曰廢道以限戎馬義勇聚教復給糧置卒守烽燧用奇正法訓兵徙戰馬內地以息邊費凡十餘事仁宗頗嘉納之入爲開封府判官坐械囚送獄道死出知蔡州徙相邢二州復提點河北刑獄事王則據恩州反京縋城趣南關入驍健營撫士卒保州振武兵焚民居欲應賊京捕斬之乃定賊遣其

黨崔象僞出降京以其持妖言惑衆又斬以徇由是營兵二十六指揮在外者皆懾服不敢叛州之南關民衆多如城中得不陷賊京有功焉京督士攻城甚力賊係京妻子乘城迫使呼曰毋亟攻城中將屠我輩矣京叱諸軍益進攻注矢仰射殺其家四人賊知京無所顧乃牽妻子去恩州平以不能預察賊降監鄆州稅先是駐泊都監田斌亦以賊發不能捕待罪兵間及城破從諸將入以功遷宮苑副使而京獨被謫御史言失察賊過輕忘家爲國義獨重不宜左遷乃徙通判兗州又徙知江陰軍知密州歷提點淮南刑獄事京西轉運使累遷兵部員外郎直史館知滄州轉運使擢天章閣待制陝西都轉運使改兵部郎中復知滄州拜右諫議大夫卒京爲人尙氣節少時與常山董士廉汾陰郭京相友善俱以倜儻聞

周渭字得臣昭州恭城人

按潑水記開作連州人

幼孤養于諸父力學工爲詩劉鋹據五嶺政繁賦重民不聊生渭率鄉人

六百踰嶺將避地零陵遂奔道州爲盜所襲脫身北上建隆初上書言時務召試賜同進士出身解褐白馬主簿縣大吏犯法渭卽斬之上奇其才擢右贊善大夫時魏帥符彥卿專恣渭知永濟縣相見略不降屈縣有盜傷人而逸渭捕獲并暴虐匿者按誅之不以送府乾德中通判興州州領宜口砦多戍兵監軍敖狠縱其下爲暴渭馳往諭以禍福斬其軍校衆皆懾服命兼本砦鈐轄開寶元年鳳州七房冶主吏盜隱官銀擇渭往代羨課數倍又遷知棣州殿直傳延翰爲監軍謀作亂走契丹爲部下所告渭擒之以聞渭在郡以簡肅稱及還吏民遮道泣留太平興國二年爲廣南諸州轉運副使初渭之入中原妻子留恭城開寶三年平廣南詔昭州訪求及是渭始還故里鄉人以爲榮渭奏去劉鋹時稅算之繁者重定田賦興學校遷殿中丞屬有事交趾主將逗撓無功有二敗卒擢甲先至邕州中奪民錢渭捕斬之後至者悉令解甲以入移書交趾諭朝廷威信將刻日再舉黎桓懼卽遣

使入貢就加監察御史徙知揚州進殿中侍御史改兩浙東西路轉運使入爲鹽鐵判官遷侍御史歷判戶部度支二勾院出知亳州俄授宋州加職方員外郎爲益州轉運使坐從子違詔市馬黜爲彰信軍節度副使咸平二年真宗聞其清節召還將復用詔下而卒年七十七以其子建中爲乘氏主簿渭妻莫荃賢婦人也渭北走時不暇與荃訣二子孩幼荃尙少父母欲嫁之荃泣誓曰渭非久困者今違難違遁必能自奮於是親蠶績確舂以給朝夕二子皆畢婚姻凡二十六年復見渭按陳水記開載渭爲廣南轉運時久已改娶使人訪其故妻先與之別可復往且我有孫婦居此久不可去渭爲具奏詔特許爲縣君并其二子皆長渭欲復迎之妻曰君既有室我不子渭皆爲奏官宋史本傳作二十六年復見渭不載渭改娶事附識 朱昂著莫節婦傳紀其事

梁鼎字凝正益州華陽人祖鉞仕蜀爲劍門關使父文獻乘氏令鼎太平興國八年進士甲科解褐大理評事知緬歸縣再遷著作佐郎端拱初獻聖德徽號頌遷殿中丞通判欽州以能聲聞徙知吉州民有蕭甲者豪猾爲民患鼎暴其凶狀杖脊黥面徙遠郡太宗尤賞其強幹代還賜緋魚舊例當給銀寶瓶帶太宗特以犀帶賜之記其名於御屏淳化中上言詔有司申明考績之法庶幾官得其人民受其賜俄爲開封府判官遷太常博士三司右計判官又爲總計判官換度支判官至道初建議興三白渠及陳許鄧潁蔡宿毫數州用水利墾田事具食貨志遷都官員外郎江南轉運副使就改起居舍人徙陝西二年五將分道擊李繼遷李繼隆擅出赤裡路無功還奏軍儲失期鼎坐削三任復爲殿中丞領職如故以母老求郡歷知徐密二州真宗踐位復舊官咸平四年遷兵部員外郎知制誥賜金紫時三司督逋員嚴急有久被留繫者命鼎與薛映按籍詳定多所蠲免踰月拜右諫議大夫度支使時西鄙未寧鼎建議陝西禁解池鹽所在官鬻詔從之以鼎爲制置使議者多言其非便鼎旣行卽移文禁止鹽商所在約束乖當延州劉廷偉慶州鄭惟吉皆不從規畫又鼎奏運咸陽倉粟以實邊粟已陳腐鼎卽

與民俟秋收易新粟上封章密陳其煩擾者甚衆鼎始謀多沮坐首議改作非是詔罷度支使守本官景德初知三班院通進銀臺司兼門下封駁事出知鳳翔府表求判西京留司御史臺三年卒年五十二鼎偉姿貌磊落尚氣有介節居官峻厲名稱甚茂好學工篆籀八分嘗著隱書三卷史論二十篇學古詩五十篇子申甫吉甫

范正辭字直道齊州人父勞謙獲嘉令正辭登第調補安陽主簿開寶中判入等遷國子監丞知戎州改著作佐郎代還治通欠於淄州轉運使稱其能轉左贊善大夫就知淄州太宗征河東諸州部糧多不及期正辭所部長山縣吏張秀督民輸受錢二千卽杖殺之郡中畏服太平興國中改殿中丞通判棣深二州遷國子博士御史中丞劉保勳奏充臺直會有言饒州多滯訟選正辭知州事至則宿繫皆決遣之胥吏坐淹獄停職者六十三人會詔令料州兵送京師有王興者懷土憚行以刃故傷其足正辭斬之興妻詣登聞上訴太宗召見正辭廷辨其事正辭曰東南諸郡饒實繁盛人心易動興敢扇搖苟失控馭則臣無待罪之地矣上壯其敢斷特遷膳部員外郎充江南轉運副使饒州民甘紹爲羣盜所掠州捕繫十四人獄具當死正辭按部察其非實命徙他所訊鞫既而民有告羣盜所在者正辭潛召監軍王愿掩捕之得所棄賊按其姦狀伏法而前十四人皆得釋端拱二年代歸監折中倉遷倉部員外郎同知幕府州縣官考課改判刑部歷戶部鹽鐵二判官遷考功員外郎通判定揚杭三州眞宗卽位遷膳部郎中召判三司句院俄復爲鹽鐵判官咸平二年出爲河東轉運使三年以本官兼侍御史知雜事時李昌齡自忠武行軍起知梓州董儼知壽州王德裔楊緘皆任轉運使後失官宰畿邑正辭上言昌齡輩貪墨著聞願陛下罷其民政詔追還儼赦餘悉代之又舉吳奮等五人堪任大郡復請令奮等各舉知縣縣令從之坐鞫任懿獄貶滁州團練副使會赦復爲倉部考功員外郎通判鄆州知淮陽軍復膳部郎中以年老求監

金定 卷三十三
兗州商稅大中祥符三年卒年七十五子誠諷並進士及第

諷字補之以蔭補將作監主簿獻東封賦遷太常寺奉禮郎又獻所爲文召試入等出知平陰縣會河決王陵埽水去而土肥失阡陌田訟不能決諷分別疆畔著爲券民持去不復爭諷辨數激昂喜爲名聲然亦操持在己吏不敢欺舉進士第遷大理評事通判淄州歲旱蝗他穀皆不立民以蝗不食菽猶可藝而患無種諷行縣至鄒平發官廩貸民縣令爭不可諷曰有責令無預也卽出貸三萬斛比秋民皆先期而輸徙知梁山軍以母老不行得通判鄆州時知州李迪貶衡州副使宰相丁謂戒使者持詔書促上道諷輒留迪數日爲治裝祖行詔塞決河州募民人芻槌而城邑與豐戶等諷改符使富人輸三之二因請下諸州以鄆爲率朝廷從其言徙知廣濟軍民避水堤居凡給徭於官者諷悉縱使護其家奏除其租賦累遷太常博士以疾監舒州靈仙觀尙御藥張懷德至觀齋祠諷頗要結之懷德薦于章獻太后遂召還問所欲言對曰今權臣驕悍將不可制蓋指曹利用也利用貶拜右司諫三司度支判官百官轉對敕近臣閱視其可行者類次以聞諷奏上親覽決可否玉清昭應宮災下有司治火所起諷曰此天之戒告乃復置獄以窮治之非所以應天也獄由是得解改尙書禮部員外郎兼侍御史知雜事錢惟演自許州來朝圖相位諷奏惟演嘗爲樞密使以皇太后姻屬罷之示天下以不私固不可復用遂以惟演守河南擢天章閣待制知審刑院出知青州再遷戶部郎中時山東饑宰相王曾青人家積粟多諷發取數千斛濟饑民因請遣使安撫京東入爲右諫議大夫權御史中丞又請益漕江淮米百萬自河陽河陰東下以賑貸之錢惟演倡議獻懿二太后宜祔真宗廟室諷彈奏之及言其在太后時權寵甚盛且與后族連姻請絀去遂貶惟演隨州陳堯佐罷參知政事有王文吉者告堯佐謀反仁宗遣中官訊問復以屬諷夜中被旨究詰旦得其

誣狀奏之諷嘗侍對帝語及郭后亡子諷冒亡子大義當廢陰合帝旨以龍圖閣直學士權三司使時狄棐爲直學士已久諷盛氣凌棐宰相李迪右之遂特詔班棐上論者非之尋轉閣學士以疾免三司使改翰林侍讀學士管句祥源觀徙會靈觀復改閣學士給事中知兗州既至郡而龐籍爲廣南東路轉運使未行上言諷以三司使曲爲左藏監庫吳守則奏課遷官尙美人同父弟娶守則女諷以銀鞍勒遣守則相結納既出兗州假翰林白金器數千兩自隨而增產於齊州市官田虧平估置獄于南京劾之諷坐方聽旨擅馳驛還兗州當贖籍所奏有實當免官宰相呂夷簡嫉諷詭激特貶諷武昌軍節度行軍司馬

按洩水記聞云范諷性剛傲好直節不拘細行爲中丞力擠張士遜援呂夷簡意夷簡引已至二府夷簡忌其剛伉久之不敢薦引諷憤激求出由是宰相李迪知兗州將行奏曰陛下朝中無臣一旦紀綱大壞然始召臣將無益夷簡愈惡之故尋被譴謫

等坐親善諷皆斥歲中徙保信軍聽居舒州持母喪又許歸齊州日飲酒自縱爲時所譏服除改將作少監知淮陽軍遷光祿卿知陝州道改潞州入見帝言元昊不可擊獨以兵守要害捍侵掠久當自服復給事中卒諷數短參知政事王隨于帝前又嘗與張士遜議事不合及爲龐籍訟人謂大臣陰諷籍焉諷頗曠達然捫闔圖進不守名檢所與遊者輒慕其所爲時號東州逸黨山東人顏太初作逸黨詩刺之而姜潛者又嘗貽書以疏其過云子寬之

劉師道字損之一字宗聖開封東明人父澤右補闕師道雍熙二年舉進士初命和州防禦推官歷保靈鎮海二鎮從事凡十年擢著作佐郎纔一月會考課又遷殿中丞出知彭州就加監察御史轉運使劉錫馬襄上其治跡召歸會浦洛之敗奉詔劾白守榮輩獄成太宗獎其勤賜緋魚川陝豪民多旁戶時有言李順之亂皆旁戶鳩集請釋旁戶爲三者長迭主之疇歲勞則授以官師道奏非便卒罷之改祠部員外郎出爲京東轉運使真宗嗣位

進秩度支咸平初徙知潤州改淮南轉運副使兼淮南江浙荆湖發運使以漕事入奏特遷司封俄爲正使改工部郎中代查道爲三司度支副使擢樞密直學士掌三班俄擢三司使從幸澶淵判隨駕三司充都轉運使坐論奏誣罔責爲忠武軍行軍司馬以郊祀恩起爲工部郎中知復州換秀州大中祥符二年以兵部郎中知潭州遷太常少卿師道敏於吏事所至有聲吏民畏愛長沙當湖嶺都會剖煩析滯案無留事歲滿復加樞密直學士換左司郎中留一任卒年五十四師道性慷慨尙氣善談世務與人交敦篤工爲詩

王濟字巨川其先真定人祖卿避地深州饒陽遂爲縣人父恕唐時童子及第開寶中知秀州會盜起城陷爲盜所殺將并害濟濟號慟謂賊曰吾父已死吾安用生爲但恨力不能殺汝以報父讐爾賊義之捨去濟攜父骨匿山谷間旣而官軍大集濟脫身謁其帥朱乙陳討賊之計乙嘉之遺以束帛奏假驛置還歸先是濟母終於岳陽權窆佛舍至是乃并護二喪還饒陽州將以聞太祖召見以其尙少且俾就學雍熙中上書自陳死事之孤得試學士院補龍溪主簿時調福建輸鶴翎爲箭羽有司督責急民甚苦之濟諭民取鵝翎代輸仍驛奏其事因詔旁郡悉如濟所陳縣有陂塘數百頃爲鄉豪幹其利會歲旱濟悉導之分溉民田汀州以銀冶構訟十年不決逮繫數百人轉運使使濟鞫之纔七日情得止坐數人再調胖城尉徙臨河主簿遷光祿寺丞權大理丞改刑部詳覆

官

按宋事實類苑云王濟爲刑部詳覆官屢上封事是時各道置提舉茶鹽酒稅官朝廷因令訪察民間事與吏之能否甚重其選會京西道闕太宗問左右刑部有好事者爲誰左右以濟對帝卽以授之宋史本傳不載附

識

通判鎮州牧守多勳舊武臣倨貴陵下濟未嘗撓屈戍卒頗恣暴不法夜或焚民舍爲盜一夕報有火濟部壯

士數十潛往偵伺果得數輩并所盜物卽斬之馳奏其事都校孫進使酒無賴毆折人齒濟不俟奏杖脊送闕下繇是軍城畏肅就遷太子中舍詔書獎勞召判登聞鼓院拜監察御史上疏陳統天下之術節民物之道大者有